



**Sumáriu Kazu**  
**Tribunál Distritál Oekusi**  
**Jullu 2022**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Distritál Oekusi**

**1. Totál kazu ne'ebé JSMP monitoriza: 11**

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime Violénsia Doméstika (VD) sira no artigu 36 kona-ba krime sira violénsia doméstika nian hanesan krime públiku)	6
Artigu 172 KP, artigu 173 KP, konjuga ho artigu 2, 3, no 35(b) no 36 (LKVD)	Krime violasaun seksuál agravadu ho natureza violénsia doméstika	1
Artigu 148 KP	Ofensa ba integridade fízika negligente	1
Artigu 145 KP	Ofensa ba integridade fízika simples	2
Artigu 160 KP, artigu 139 no artigu 224 KP	Krime sequestru, omisídiu agravadu no krime destruisaun, subtrasaun, okultasaun, ka profanasaun ba kadaver	1
<b>Totál</b>		<b>11</b>

**2. Totál desizaun ne'ebé JSMP monitoriza : 7**

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	4

Admoestasaun	Artigu 82 KP	1
Omologa pedidu dezisténsia keixa	-	2
<b>Totál</b>		<b>7</b>

### 3. Totál kazu sira ne'ebé adia tuir JSMP monitorizasaun : 1

Razaun adiamentu	Númeru
Arguidu ho lezada lamarka prezensa	1
<b>Totál</b>	<b>1</b>

### 4. Total kazu sira ne'ebé kontinua prosesu tuir JSMP nia monitorizasaun : 3

#### B. Deskrisaun sumáriu julgamentu ba desizaun kazu sira

##### 1. Krime ofensa ba integridade física simples ho natureza violénsia doméstika

Nú. Prosesu : 0011/21.OEOSL  
 Kompozisaun Tribunál : Singulár  
 Juis : Dr. Yudi Pamukas  
 Prokuradór : Dr. Mateus Nesi  
 Defeza : Dr. Calisto Tout  
 Desizaun : Pena rizaun tinan 1 suspende ba tinan 1 ba kada arguidu ho arguida

Iha 04 Jullu 2022, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu FA ho nia feen RC hasoru sira nia oan, iha Distritu Oekusi.

##### Akuzasaun Prokuradór

Prokuradór akuza katak iha 17 Setembru 2021, maizumenus iha oras tuku 08:00 dadeer, lezada ho arguida diskute malu kona-ba lezada lakohi ba kuru be'e, ho nune'e arguida lori fatuk tuda lezada no kona iha lezada nia liman kabun parte karuk rezulta lezada sofre moras hafoin arguida mós buti lezada nia kakorok. Nune'e arguidu hirus foti fiu elektrisidade hodi baku dala rua iha arguida nia kotuk laran rezulta metan, bubu no moras. Arguidu mós kontinua lori fiu refere baku dala ida iha lezada nia kotuk laran rezulta bubu, mean no moras. Kazu ne'e aneksa hamutuk ho relatóriu médiku husi Sentru Saúde Oesilo no fotografia kona-ba aktu violénsia ne'e hasai husi polísia.

Prokuradór akuza arguidu ho arguida kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35 ( c) no 36 LKVD.

##### Produsaun ba prova sira

Iha julgamentu, arguidu ho arguida konfesa faktu hotu iha akuzasaun no hatene hahalok sira hanesan ne'e ladi'ak no bele halo lezada sofre moras. Arguidu no arguida diak malu ona no kontinua hela hamutuk iha uma ida. Depoisde akontesementu arguidu ho arguida arrepende ona sira nia hahalok, foin primeiravés mai hatan iha tribunál,

promete sei larepete hahalok hanesan iha futuru, serbisu hanesan toos na'in no laiha rendimentu fiksi kada fulan no arguidu no arguida iha oan na'in lima.

Entretantu lezada kontinua konfirma faktu hotu no arguida hanesan nia inan no arguidu hanesan nia aman. Depoisde akontesementu kontinua dame malu kedas too agora moris hamutuk nafatin iha uma ida.

### **Alegasaun finál**

Prokuradór intende katak arguidu ho arguida sira nia hahalok ne'e provadu no konsidera priense duni elementu husi krime ofensa ba integridade fízika simples ho natureza violénsia doméstika hasoru nia oan no arguidu mós provadu konsidera sala tanba baku nia feen. Tanba ne'e, prokuradór laiha duvida ba faktu sira hotu iha akuzasaun no husu ba tribunál atu kondena arguidu no arguida ho pena sira ne'ebé hakerek ona iha artigu 145 KP.

Enkuantu defeza haktuir katak durante iha produsaun ba prova, arguidu ho arguida kolabora diak ho tribunál konfesa faktu integralmente. Defeza haktuir tan katak depoisde akontesementu arguidu ho arguida konsidera hahalok hanesan ne'e ladi'ak no arrepende ona sira nia hahalok, diak malu ona too agora moris hamutuk nafatin iha uma ida, foin primeiravés mai hatan iha tribunál, serbisu hanesan toos na'in no dona de casa laiha rendimentu fixu kada fulan, iha oan na'in lima no arguidu ho arguida mak iha responsabilidade maximu ba lezada ho nia família sira hotu.

### **Desizaun**

Depoisde avalia faktu hotu, tribunál prova katak lezada ho arguida diskute malu kona-ba lezada lakohi ba kuru be'e, ho nune'e arguida lori fatuk tuda lezada no kona iha lezada nia liman kabun parte karuk rezulta lezada sofre moras hafoin arguida mós buti lezada nia kakorok. Nune'e arguidu hirus foti fiu elektrisidade hodi baku dala rua iha arguida nia kotuk laran rezulta metan, bubu no moras. Arguidu mós kontinua lori fiu refere baku dala ida iha lezada nia kotuk laran rezulta bubu, mean no moras.

Bazeia ba faktu provadu hirak ne'e hotu no tetu mós ho sirkunstánsia atenuante sira hanesan arguidu no arguida konfesa, arrepende ona sira nia hahalok, diak malu ona no foin primeiravés mai hatan iha tribunál, Ho nune'e tribunál konklui prosesu ne'e no kondena arguidu no arguida ho pena prizaun tinan ida suspende ba tinan ida.

## **2. Krime ofensa ba integridade fízika simples ho natureza violénsia doméstika**

Nú. Prosesu : 0012/21.OEOSL  
Kompozisaun Tribunál : Singulár  
Juis : Dr. Hugo da Cruz Pui  
Prokuradór : Dr. Pedro Baptista Aleixo dos Santos  
Defeza : Dr. Marcelino Marques Coro  
Desizaun : Pena suspensaun

Iha 06 Jullu 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve

arguidu JSC no arguida TP (arguidu nia inan lezada nia banin) hasoru arguidu nia feen, Iha Distritu Oekusi.

### **Akuzasaun Prokuradór**

Prokuradór akuza katak iha 08 Novembru 2021, maizumenus iha oras tuku 12:00 meiodia, arguidu tebe dala ida iha lezada nia kotuk laran kauza bubu no moras. Hafoin arguida foti ai-sanak baku dala ida iha lezada nia ulun kauza mean, bubu no moras. Kazu ne'e aneksa hamutuk ho relatóriu médiku husi Sentru Saúde Oesilo no fotografia kona-ba aktu violénsia ne'e hasai husi polísia.

Prokuradór akuza arguidu no arguida kontra artigu 154 KP kona-ba krime ofensa ba integridade fízika simples ho moldura penal too tinan 3 ka multa konjuga artigu 2, 3(a), 35(b) no 36 husi LKVD.

### **Produsaun ba prova sira**

Iha julgamentu, arguidu no arguida konfesa integralmente ba faktu sira iha akuzasaun no hatene hahalok hanesan ne'e ladi'ak, arrepende ona sira nia hahalok, foin primeiravés baku lezada no mai hatan iha tribunál, seidak diak malu ho lezada tanba depoisde akontesementu lezada sai husi uma no lakohi ona atu moris hamutuk ho arguidu. Arguidu serbisu hanesan toos na'in laiha rendimentu fiksi kada fulan, iha oan na'in ida no arguidu mak tau matan ba sira nia oan na'in ida iha uma.

Alende ne'e lezada kontinua konfirma faktu hotu iha akuzasaun no deklara katak depoisde akontesementu too agora arguidu ho lezada hela keta-ketak tanba lezada lakohi ona atu moris hamutuk ho arguidu, tanba durante ne'e sira hela ho arguida ne'ebé hanesan mós lezada nia banin.

### **Alegasaun finál**

Prokuradór intende katak laiha duvida ba faktu hotu iha akuzasaun tanba iha produsaun ba prova arguidu no arguida rasik konfesa faktu integrelemente. Prokuradór konsidera arguidu no arguida nia hahalok ne'e priense duni elementu husi krime ofensa ba integridade fízika simples ho natureza violénsia doméstika. Prokuradór hanoin katak arguidu no arguida tau hamutuk forsa hodi halo agresaun fízika hasoru lezada ate lezada rasik lakohi ona atu moris hamutuk ho arguidu no deside sai husi sira ninia uma tanba lasente hela hakmatek ho arguidu no arguida. Tanba ne'e husu ba tribunál atu kondena arguidu no arguida tuir pena ne'ebé hakerek ona iha artigu 145 KP.

Entretantu defeza husu ba tribunál atu kondena arguidu no arguida ho pena ne'ebé kmaan ho konsiderasaun katak arguidu no arguida kolabora diak no konfesa integralmente faktu hotu iha akuzasaun, arrepende ona sira nia hahalok, foin primeiravés baku lezada no mai hatan iha tribunál, seidak diak malu ho lezada tanba depoisde akontesementu lezada sai husi uma no lakohi ona atu moris hamutuk ho arguidu. Arguidu no arguida serbisu hanesan toos na'in laiha rendimentu fiksi kada fulan, oan na'in ida no arguidu mak tau matan ba sira nia oan no promete sei la repete tan hahalok refere iha futuro.

### **Desizaun**

Depoisde avalia ba faktu hotu, tribunál prova katak arguidu tebe dala ida iha lezada nia kotuk laran kauza bubu no moras. Hafoin arguida foti ai-sanak baku dala ida iha lezada nia ulun kauza mean, bubu no moras.

Bazeia ba faktu provadu hirak ne'e hotu no tetu mós ho sirkunstánsia atenuantes sira hanesan arguidu no arguida konfesa, arrepende ona sira nia hahalok, foin primeiravés baku lezada no mai hatan iha tribunál no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida no kondena arguida ho pena prizaun fulan sia suspende ba tinan ida.

### **3. Krime ofensa ba integridade fízika simples**

Nú. Prosesu : 0176/20.OESIC  
Kompozisaun Tribunál : Singulár  
Juis : Dr. Yudi Pamukas  
Prokuradór : Dr. Mateus Nesi  
Defeza : Dr. Marcelino Marques Coro  
Desizaun : Pena prizaun tinan 1 suspende ba tinan 2

Iha 18 Jullu 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ne'ebé envolve arguidu Joni Neno Abi hasoru nia kuiñadu Jose Luis Tael, iha Suku Naimeco, Sub-distritu Pante-makasar, Distritu Oekusi.

#### **Akuzasaun Prokuradór**

Prokuradór akuza katak iha 09 Dezembru 2020, maizumenus iha oras tuku 08:00 dadeer, arguidu fakar sasoro manas ba lezadu nia ulun kauza manas no moras, arguidu kontinua tuku dala rua iha lezadu nia reen-toos, tuku dala ida iha lezadu nia ibun, tebe dala rua iha kotuk laran no tebe tan dala rua iha kelen parte karuk rezulta lezadu monu ba rai. Kazu ne'e akontese tanba lezadu fó isin rua tiha arguidu nia feton husik de'it arguidu nia feton no lamoris hamutuk. Kazu ne'e aneksa hamutuk ho relatóriu médiku husi Sentru Saúde Baqui no fotografia kona-ba aktu violénsia ne'e hasai husi polísia.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penal too tinan 3 ka multa.

#### **Produsaun ba prova sira**

Iha julgamentu, arguidu konfesa faktu parsialmente katak loos duni iha 09 Dezembru 2020, maizumenus iha oras tuku 08:00 dadeer. Arguidu fakar duni sasoro manas ba lezadu nia ulun, tuku dala ida iha lezadu nia reen-toos laos dala rua, tuku dala ida iha ibun, tebe dala ida iha kotuk laran laos dala rua no tebe tan dala ida iha kelen parte karuk laos dala rua no la rezulta lezadu monu ba iha rai. Arguidu deklara katak hatene hahalok hanesan ne'e ladi'ak no arrepende ona nia hahalok, foin primeiravés mai hatan iha tribunál, seidak diak malu, dezempregadu laiha rendimentu fiksu kada fulan, oan na'in rua no promete sei la repete hahalok hanesan ne'e hasoru lezadu ka ema seluk iha futuru.

Enkuantu lezadu konfirma faktu hotu ne'ebé hakerek ona iha akuzasaun no depoisde akontesementu, arguidu labuka lezadu atu dame malu. Lezadu haktuir tan katak lakohi ona atu dame malu ho arguidu tanba arguidu baku no tebe dala barak iha lezadu nia isin sira.

### **Alegasaun final**

Prokuradór intende katak mezmu iha produsaun ba prova arguidu konfesa faktu parsialmente maibé prokuradór konsidera faktu hotu iha akuzasaun loos hotu. Prokuradór reforsa liután katak loloos arguidu uza maneira seluk ne'ebé bele resolve kualker problema laos uza fali violénsia hodi resolve problema. Tanba ne'e, prokuradór husu ba tribunál atu aplika pena ne'ebé hakerek ona iha artigu 145 KP.

Entretantu defeza intende katak iha produsaun ba prova arguidu kolabora diak hodi konfesa ona faktu parsialmente no parte fiar liu ba arguidu nia deklarasaun tanba arguidu deklara ho onestu tuir buat ne'ebé akontese ka arguidu halo hasoru lezadu. Defeza haktuir tan katak arguidu arrepende nia hahalok, foin primeiravés mai hatan iha tribunál, dezempregadu laiha rendimentu fiksi kada fulan, oan na'in rua no promete sei la repete tan hahalok hanesan hasoru lezadu ka ema seluk iha futuro. Tanba ne'e, husu ba tribunál atu aplika pena ne'ebé kmaan ba arguidu.

### **Desizaun**

Depoisde avalia ba faktu hotu, tribunál prova katak arguidu fakar sasoro manas ba lezadu nia ulun kauza manas no moras, arguidu kontinua tuku dala rua iha lezadu nia reen-toos, tuku dala ida iha lezadu niaibun, tebe dala rua iha kotuk laran no tebe tan dala rua iha kelen parte karuk rezulta lezadu monu ba rai.

Bazeia ba faktu provadu hirak ne'e hotu no tetu mós ho sirkunstánsia atenuantes sira hanesan arguidu foin primeiravés mai hatan iha tribunál, arrepende ona nia hahalok no promete sei la komete tan hahalok hanesan iha futuro, nune'e tribunál konklui prosesu ne'e no kondena arguidu ho pena prizaun tinan ida suspende ba tinan rua.

## **4. Krime ofensa ba integridade física simples ho natureza violénsia doméstika**

Nú. Prosesu	: 0007/21.PDOEC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro
Desizaun	: Pena admoestasaun

Iha 21 Jullu 2022, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguida AF hasoru nia oan feto, iha Distritu Oekusi.

### **Akuzasaun Prokuradór**

Prokuradór akuza katak iha 04 Janeiru 2021, maizumenus iha oras tuku 20:00 kalan, arguida ho nia laen diskute malu hela, derepente lezada mosu mai halo arguida hirus

liután, ho nune'e arguida basa dala ida iha lezada nia asentu rezulta lezada sofre moras. Kazu ne'e aneksa hamutuk ho relatóriu médiku husi PRADET no fotografia kona-ba aktu violénsia ne'e hasai husi polísia.

Prokuradór akuza arguida kontra artigu 145 KP kona-ba krime ofensa ba integridade fízika simples ho moldura penal too tinan 3 ka multa konjuga ho artigu 2, 3(a), 35(c) no 36 husi LKVD.

### **Produsaun ba prova sira**

Iha julgamentu, arguida konfesa faktu hotu iha akuzasaun no hatene hahalok hanesan ne'e ladi'ak, arrepende ona sira nia hahalok. Arguida foin primeiravés baku lezada no mai hatan iha tribunál, diak malu ona no hela hamutuk nafatin iha uma ida hanesan família ida, serbisu hanesan toos na'in laiha rendimentu fiksi kada fulan. Arguida deklar katak iha oan na'in haat, arguida mak iha responsabilidade ba iha nia família no promete sei larepete tan hahalok hanesan hasoru lezada no membru família seluk iha futuro.

Prokuradór husu atu presinde lezada nia deklarasaun no husi parte defeza konkorda ho pedidu ne'e. Tanba ne'e, tribunál bazeia ba pedidu ne'e presinde lezada nia deklarasaun, tanba arguida konfesa faktu hotu iha akuzasaun.

### **Alegasaun finál**

Prokuradór hanoin katak laiha duvida ba faktu hotu iha akuzasaun tanba iha produsaun ba prova arguida konfesa faktu hotu iha akuzasaun. Prokuradór reforsa liután katak loloos arguida mak tenke protéje oan sira husi kualker aktu krime maibé pelu kontrariu arguida mak pratika fali krime hasoru ninia oan. Tanba ne'e, husu ba tribunál atu aplika pena admoestasaun ba arguida.

Entretantu defeza intende katak iha produsaun ba prova arguida kolabora diak no konfesa integralmente ba faktu hotu iha akuzasaun, arrepende ona nia hahalok, foin primeiravés baku lezada no mai hatan iha tribunál, di'ak malu ona, serbisu hanesan toos na'in laiha rendimentu fiksi kada fulan, oan na'in haat no promete sei larepete tan hahalok hanesan iha futuro. Tanba ne'e, defeza aseita ho prokuradór nia pedidu ne'e atu kondena arguidu ho pena admoestasaun.

### **Desizaun**

Depoisde avalia faktu hotu, tribunál prova katak arguida basa dala ida iha lezada nia asentu rezulta lezada sofre moras.

Bazeia ba faktu provadu hirak ne'e no tetu mós ho sirkunstánsia atenuantes sira hanesan arguida konfesa, arrepende nia hahalok, foin primeiravés mai hatan iha tribunál, ho nune'e tribunál konklui prosesu ne'e no kondena arguida ho pena admoestasaun.

## **5. Krime ofensa ba integridade fízika simples**

Nú. Prosesu : 0014/22.OESIC

Kompozisaun Tribunál : Singulár

Juis : Dr. Hugo da Cruz Pui  
Prokuradór : Dr. Pedro Baptista Aleixo dos Santos  
Defeza : Dr. Marcelino Marques Coro  
Desizaun : Omologa pedidu dezistensia keixa

Iha 21 Jullu 2022, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Domingos Sico hasoru lezadu Agostinho Bacun Colo ho lezada Arjila Maria Fatima Sila, iha Suku Costa Sub-distritu Pante-makasar, Distritu Oekusi.

### **Akuzasaun Prokuradór**

Prokuradór akuza katak iha 25 Feveireiru 2022, iha oras tuku 18:00 lokraik. Antes ne'e arguidu lori nia motor ba hadia iha lezadu sira nia Oficina-Numbey no depoisde hadia tiha arguidu kontinua viagem maibé foin mak too iha dalan klaran motor ninia kondisaun liuliu iha parte ne'ebé lezadu hadia ne'e aat fali. Nune'e arguidu ho hirus fila fali mai iha lezadu ho lezada sira nia oficina hodi basa dala ida iha lezada nia hasan parte loos rezulta lezada sofre moras. Arguidu mós kontinua basa dala ida iha lezadu nia reen-toos rezulta lezadu sofre moras. Kazu ne'e aneksa hamutuk ho relatóriu médiku husi Ospítal Referral Oekusi no fotografia kona-ba aktu violénsia sira ne'e hasai husi polísia.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguid, lezadu no lezada.

Iha prosesu konsiliaun ne'e, lezadu ho lezada hakarak dame malu ho arguidu maibé ho kondisaun arguidu tenke fó osan US\$200.00 ba lezada no lezadu no iha futuru arguidu labele repete hikis nia hahalok ne'e hasoru lezadu no lezada. Alende ne'e arguidu mós konkorda ho pedidu husi lezadu no lezada sira nian no deklarata katak arrepende ona sira nia hahalok no promete sei la repete tan hahalok hanesan iha futuru, nune'e lezadu ho lezada husu ba tribunál atu deziste tiha sira ninia-keixa hasoru arguidu.

### **Alegasaun finál**

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia husi lezadu no lezada, nune'e tribunál konklui prosesu ne'e no omologa akordu dame entre parte sira, maibé ho kondisaun katak iha 30 Jullu 2022, arguidu tenke entrega osan ho montante US\$200.00 ba iha lezada ho lezadu.



## **6. Krime ofensa ba integridade fízika negligente**

Nú. Prosesu : 0001/22.OEOSL  
Kompozisaun Tribunál : Singulár  
Juis : Dr. Yudi Pamukas  
Prokuradór : Dr. Mateus Nesi  
Defeza : Dr. Marcelino Marques Coro  
Desizaun : Omologa pedidu dezisténsia keixa

Iha 25 Julu 2022, Tribunál Distritál Oekusi prezide julgamentu tentativa konsiliaun ba kazu ofensa ba integridade fízika negligente ne'ebé envolve arguida Lucia Taela hasoru nia laen Quintiliano Quelo Sila, iha Suku Usitasae, Sub-distritu Oesilo, Distritu Oekusi.

### **Akuzasaun Prokuradór**

Prokuradór akuza katak iha 11 Janeiro 2022, iha oras tuku 17:00 lokraik. Antes ne'e arguidu ho lezada diskute malu kona-ba osan US\$65 ne'ebé arguidu entrega de'it US\$60 ba lezada. Tuir mai, arguida tama ba uma laran fui be'e manas ne'ebé nono hela iha dapur laran atu fó haris sira nia oan. Bainhira arguida lori bee manas sai ba liur, lezadu mós tama ba uma laran, ho nune'e arguida ho lezada soke malu iha odamatan, rezulta bee manas fakar kona iha lezadu nia oin no kabaas kauza lezadu sofre kanek, isin kulit nakles no moras. Kazu ne'e aneksa hamutuk ho relatóriu médiku husi Ospitál Referral Oekusi no fotografia kona-ba aktu violénsia sira ne'e hasai husi polísia.

Prokuradór akuza arguida kontra artigu 148 (1) KP kona-ba ofensa ba integridade fízika negligente ho moldura penál to'o tinan 1 ka multa.

### **Produsaun ba prova sira**

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguida no lezadu.

Iha prosesu konsiliaun ne'e, lezadu hakarak dame malu ho arguida sein kondisaun ruma tanba depoisde akontesementu sira kontinua di'ak malu too agora moris hamutuk nafatin iha uma ida. Enkuantu husi arguida mós konkorda ho pedidu lezadu nian no deklara katak arrepende ona ba nia hahalok no promete sei la repete tan hahalok hanesan iha futuro, nune'e lezadu husu ba tribunál atu deziste tiha ninia-keixa hasoru arguida.

### **Alegasaun finál**

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia husi lezadu, nune'e tribunál konklui prosesu ne'e no omologa akordu dame ne'e.

## **7. Krime ofensa ba integridade fízika simples ho natureza violénsia doméstika**

Nú. Prosesu : 0002/22.OEPSB  
Kompozisaun Tribunál : Singulár  
Juis : Dr. Hugo da Cruz Pui  
Prokuradór : Dr. Pedro Baptista Aleixo dos Santos  
Defeza : Dr. Marcelino Marques Coro  
Desizaun : Pena prizaun fulan 6 suspende ba tinan 1

Iha 29 Jullu 2022, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida AB hasoru nia bei-oan, iha Distritu Oekusi.

### **Akuzasaun Prokuradór**

Prokuradór akuza katak iha 08 Feveireiru 2022, maizumenus iha oras tuku 15:00 lokraik, arguida foti fatuk deut ai-manas nian hodi tuku dala ida iha lezadu niaibun parte loos rezulta kanek no moras. Antes agresaun ne'e, arguida haruka lezadu atu deut ai-manas, maibé lezadu mura-mura no laiha vontade atu deut aimanas, ho nune'e mosu agresaun ne'e. Kazu ne'e aneksa hamutuk ho relatóriu médiku husi Sentru Saude Pasabe no fotografia kona-ba aktu violénsia ne'e hasai husi polísia.

Prokuradór akuza arguida kontra artigu 145 KP kona-ba krime ofensa ba integridade fízika simples ho moldura penal too tinan 3 ka multa konjuga ho artigu 2, 3(a), 35(c) no 36 husi LKVD.

### **Produsaun ba prova sira**

Iha julgamentu, arguida konfesa faktu hotu iha akuzasaun no hatene hahalok hanesan ne'e ladi'ak, arrepende ona nia hahalok, foin primeiravés baku lezadu hanesan nia beioan rasik no arguida hela hamutuk ho lezadu desde sei kiik oan maibé depoisde akontesementu, lezadu lakohi ona atu hela ho arguida hanesan nia avo no sai ba hela hamutuk fali ho nia inan no aman. Arguida iha responsabilidade maximu ba lezadu too iha akontesementu, serbisu hanesan toos na'in laiha rendimentu fiksi kada fulan. Arguida deklarata katak iha oan na'in lima no promete sei larepete tan hahalok hanesan hasoru lezadu ka membru família seluk iha futuru tanba arguida mós idade ona.

Prokuradór husu atu presinde lezadu nia deklarasaun no husi parte defeza konkorda ho pedidu ne'e. Tanba ne'e, tribunál bazeia ba pedidu ne'e presinde lezadu nia deklarasaun ho konsiderasaun katak iha produsaun ba prova arguida rasik konfesa faktu hotu sein rezerva.

### **Alegasaun finál**

Prokuradór hanoin katak laiha duvida ba faktu hotu iha akuzasaun tanba iha produsaun ba prova arguida konfesa faktu hotu iha akuzasaun. Prokuradór reforsa liután katak loloos arguida mak tenke protéje nia bei-oan husi kualker aktu krime maibé pelu kontrariu arguida mak prátika fali krime hasoru ninia bei-oan, nune'e husu ba tribunál atu aplika pena admoestasaun ba arguida ho konsiderasaun arguida idade ona no sei lahamosu tan krime foun iha futuru.

Entretantu defeza intende katak iha produsaun ba prova arguida kolabora diak ho tribunál hodi konfesa faktu integralmente. Defeza reforsa liután katak arguida idade avansadu ona no sei larepete hikas nia hahalok ne'e iha futuru, arrepende ona nia hahalok, foin primeiravés baku lezadu no mai hatan iha tribunál, diak malu ona, serbisu hanesan toos na'in laiha rendimentu fiksi kada fulan, oan na'in lima no promote sei larepete hahalok refere iha futuru, nune'e husu ba tribunál atu kondena arguida ho pena admestasaun.

### **Desizaun**

Depoisde avalia ba faktu hotu, tribunál prova katak arguida foti fatuk deut ai-manas nian hodi tuku dala ida iha lezadu nia ibun parte loos rezulta kanek no moras.

Bazeia ba faktu provadu hirak ne'e hotu no tetu mós ho sirkunstánsia atenuantes sira hanesan, arguida konfesa, arrepende ona nia hahalok, foin primeiravés mai hatan iha tribunál no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguida ho pena prizaun fulan neen suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)